

SINLAI – 4
LAISIANGTHOU DUNGZUI A HOTDAMNA DIA PATHIAN THILGEL

Thumapi: I sinna sa ah Laisiangthou khen dik a poimoh dan, Laisiangthou a Hunpi thumte: Pate Hun, Judate (Mosi Dan) Hun leh Khristian Hun a kilamdan dan i sin ta ua; hiai Hunte ah Pathian kikhek ngei kei mahleh a deihdan ahun a tuam dungzui a a khen touh zel dan bang i muta uhi. Huaiziakin Pate Hun a mite hotdamna muh dan leh Mosi Dan hun a hotdamna muh dan a kibang kei a; huchi mahbang in Khristian Hun, Jesu Khris thohnawn nung a hotdam dan leng a tuam lai hi.

I theihciamna di'n khros leek a suamhatpa i en ding uh (Luka 23:40-43). Hiai pa'n kisik a ngaihdam a nget ziak in Jesu'n "Tuni'n ka kiang ah Paradise ah na om sam ding" achi hi. Thukhun Thak tuh Jesu Khris thohnawn nung, Penticost ni (Nasepte bung 2) a kipan ahih ziak in hiai suamhatpa'n tuh Mosi Dan nuai a hotdamna mu ahi. Himahleh Mihing Tapa in leitung a hong om lai a kituak leh kilawm a sak bang a Pathian Tapa ahihna taklatna dia khelhnaate ngaihdam theihna a neih ziak in (Matthai 9:6), Mosi in Sinai Tang a a laak Dante hiam, Baptispa Johan in a piak baptisma hiam zui in chi tuan lou in, "Tuni'n ka kiang ah Paradise ah na om sam ding" (Luka 23:43) achi pah geih mai hi. Jesu Khris han apan a thohnawn mateng Mosi Dan (Juda sahkua) kizang lai (Heb. 9:16-17; Kol. 2:14) ahih man in leh Khris min a baptisma tan ding thu leng piak a om nai lou ahihmanin khros leek a suamhatpa leh Jakai hotdamna ding in a poimoh kha kei hi.

Baptisma tuh Jesu sihna, vui a omna leh a thohnawnna chinna ahih ziak in (Rome 6:3-4), Jesu Van a a kal kuan in amah gingtate Pa leh Tapa leh Khasiangthou min a baptis ding thu a pe pan hi (Matthai 28:19). Marka ah hotdamna toh kisai a Jesu thugenna tuh "A gingta a baptisma tang tuh hotdam in a om ding" (Marka 16:16) chih ahi. Hiai hotdamna ding a thupiak thak in mi tengteng, nam tengteng, khovel tengteng leh hun hong tung zel ding khovel tawp tan pha a huap vek hi (Nasepte 2:39).

HUAIZIAKIN, JESU KHRIS THUPIAK DUNGZUI A TU HUN A HOTDAM A I OM THEIHNA DI'N TUH:

I. KHRIS TANCHINHOIH ZAKNA TELLOU-THEILOU AHI.

1. Khris Tanchinhoih lou a hotdam a om theih ahih louh ziak in (1 Korinth 15:1-4).
2. Jesun hotdamna dia Tanchinhoih hilh ding thu a piak ziak in (Marka 16:15-16).
3. Hotdamna dia zakna a poimoh ziakin (Rom 10:13-15).
4. Ginna tuh zakna ziak a hong om ahih ziak in (Rome 10:17)

II. JESU KHRIS GINTAKNA TELLOU-THEILOU AHI.

1. Ginna lou a Pathian pahtaklam mi hih vual ahih louh ziak in (Heb. 11:6).
2. Jesu Khris tanchin Laisiangthou in a gente adik ahi chih ginna a poimoh ziak in (Heb. 11:1).
3. Gingta loupai a, amah sap theih ahih louh ziak in (Rome 10:14).
4. Ginna tuh hotdamna dia poimoh ahih ziak in (Marka 16:16).
5. Muh theih a pailou a, ginna a pai i hih ziak in (2 Korinth 5:7).
6. Ginlouhna tuh khelhna ahih ziak in (Rome 14:23)
7. A gingtalou tuh siamlouhtang ding ahih ziak in (Marka 16:16)

III. KHELHNATE KISIKNA TELLOU-THEILOU AHI.

1. Mi piching khempeuh mikhial ahiah ziaak in (Rome 3:23).
2. Pathian in mi tengteng khelhna kisik ding thu a piak ziaak in (Nasepte 17:30).
3. Kisikna tuh khelhna ngaihdamna ding ahiah ziaak in (Nasepte 2:38).
4. Kisikna tuh Khasiangthou tanna dia a poimoh ziaak in (Nasepte 2:38).
5. Kisikna tuh khelhnate nulumangna dia a poimoh ziaak in (Nasepte 3:19).
6. Kisikloute mangthang ding ahiah ziaak un (Luka 13:3)

IV. KHRIS GINNA PUANKHIAK TELLOU THEILOU AHI.

1. Kam a gupna tuh hotdamna ding ahiah ziaak in (Rome 10:8-10).
2. Mikhial kisik in baptisma a tan ma a Jesu Khris a ginna puanna a poimoh ziaak in (Nasepte 8:37-38).
3. Kam a gumloute van a Pa mai a ama'n leng gumlou ding ahiah ziaak in (Matthai 10: 32-33; Marka 8:38).

V. KHRIS BAPTISMA TANLOUH-THEIHLLOUH AHI.

1. Khris a hotdamna a om ziaak in (2 Tim. 2:10) Kris a i kibaptis/thop a ngai (Rome 6:3; Gal. 3:27).

Theih ding: Khris a hotdamna a om ziaak in Khris a i ki baptis chiang in hotdamna ah i lut uh chihna ahi.

2. Khelhnate ngaihdamna dia ki baptis a poimoh ziaak in (Nasepte 2:38).
3. Khasiangthou tanna dia baptisma a poimoh ziaak in (Nasepte 2:38).
4. Khelhnate silsiangna dia kibaptis a poimoh ziaak in (Nasepte 22:16).
5. Kipahna (khalam a) neihna dia baptisma tan a poimoh ziaakin (Nasepte 8:38-39; 16:34).
6. Hotdamna dia gintak a, baptisma tan a poimoh ziaak in (Marka 16:16; 1 Peter 3:20-21).
7. Tui leh Kha a piangthak loute Pathian gam a lut lou (hotdam a om lou) ding ahiah ziaak in (Johan 3:5)

Huaiziakin Pentikost ni a piangthak masapente mahbang a gintak a, khelhnate kisik a, Khris a ginna puang a baptisma tan tuh hotdamna dia alou-theilou ahi (Nasepte 2:37-41). Laisiangthou in hotdamna dia a gen, atung a ngate lak a khatpeuh, khat kia hih a hotdam ding achi kei a, avek a hihbukim a hotdam ding achi zaw hi. "Thutak na thei ding ua, thutak in sal a kipan hon suakta-sak ding" (Johan 8:32).

Huaiziakin ginna kia hiam, baptisma kia hiam in hon hondam thei kei a, a pankhawm chiang in thutak a suak a, huai in hon hondam hi. "Na thu kigawmkhawm tuh thutak ahi a; na vaihawmna diktak chiteng leng khantawn in a om nilouh ding hi" (Sam 119:160).

SINLAI 5-NA ETKHIAKNA

1. Khristian kichi chiatchiat lak a kibat louhna nak aziak 3-te gen in.
 - i) _____
 - ii) _____
 - iii) _____
2. Khristian masate pianthakna leh a pianthak dan uh koi laibu ah i mu thei dia?

3. Jesu bang Dan nuai a piang ahia?

4. Jesu sih ma, a thohnawn ma in khristian bangzah a om a?

A om leh / a om keileh aziak bang ahia?

5. Jesu'n khristian hihtheihna dia a dan piakte koisan-san ah i mu thei a? Laisiangthou tang mun 3 gelh in.
 - i) _____
 - ii) _____
 - iii) _____
6. Thukhun Thak zat ding hun Jesu genkholhna, Luka 24:46-49 a athupi deuh point 4-te gelh in.
 - i) _____
 - ii) _____
 - iii) _____
 - iv) _____
7. Luka 24:46-49 a Jesu genkholh tangtunna koimun ah i mu thei a?

8. Thukhun Thak nuai a piangthak masapen, Pentikost ni a 3,000-te pianthak dan gelh inla, a Laisiangthou tang toh pia in.

9. Hiai piangthak masapente pianthak dan mi tengteng etton ding a hihdan genna, Laisiangthou tang khat gelh in. _____

Nasepte bu a piangthak i muhte baptisma tanglou a om uhia?

10. Nasepte 18:8 a Korinthte lak a piangthak Krispa, kikhopna-inn heutupa baptisma tanna koimun ah i mu thei a? _____

11. Hotdam hih theihna dia Laisiangthou in a gen Thukihilhna, Zakna, Ginna, Kisikna, Ginna Puanna leh Baptisma-te hihbukim lou in, mi hotdam in a om thei diam?

12. Hiai anuai a mun-awngTe sudim in.

i) “Huchiin _____ tuh _____ ziaik in a hong om a, huan, _____ tuh _____ kigen ziaik in a hong om hi” (Rome 10:17).

ii) “Himahleh _____ lou in amah _____ lam mi hih vual ahi kei; _____ kiang a hong pai in, amah tuh a om chih leh a _____ mite lohching sak pa ahi chih _____ ding ahi” (Heb. 11:6).

iii) “Huchiin, Pathian in i _____ lai khawng bang a _____ a, himahleh, tu’n ah zaw _____ chih a mi tengteng _____ ding _____ a peta hi, ni a chiam ziaik in” (Nasepte 17:30).

iv) “Huchiin, _____ ma a hon _____ peuhmah tuh, _____ ma ah _____ sam ding. Himahleh, kuapeuh mite ma a hon _____ tuh, ka _____ ah ka _____ sam ding” (Matthai 10:32-33).

v) “Huan, bangdia _____ na hia? Thou inla, amah _____ lou kawm in _____ tang inla, na _____ hihsiang ta’nla, a hon chi hi” (Nasepte 22:16).

13. Jesu hong pai nawn chiang a vaihawmna a a dan zat ding tuanna laibu min bang a kichi a? (Johan 12:48).

14. Laisiangthou a piangthak i muhte toh a pianthak dan kituakloute hotdam ahi ding uam?

